

Uunga siunnersuut: Kalaallit Nunaanni sullivimmi avatangiisinut inatsisip allangortinneqarnissaanut inatsisissatut siunnersuutip (Sullivimmi tarnikkut avatangiisit, isumannaatsuuneq aamma peqqinneq pillugit suliffeqarfiup suleqataanera, sulliviit naliliiffiqineqartarnerinut piunasaqaatinik sukaterineq, Sullivinnik Nakkutilliisoqarfiup qisuariaateqarnissamut periarfissaanik annertusaaneq, paasissutissanik katersuineq, suliarinninneq aamma ingerlatitseqqiineq, suliffeqarfinnik isumaqatigiissuteqartarnerup ingerlasarnera, pillaatissiissutinik sakkortunerulersitsineq il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaat

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussissut

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerneqarnera

Aalajangiiffigisassatut siunnersuummi matumani *Kalaallit Nunaanni sullivimmi avatangiisit pillugit inatsisip allangortinnissaa pillugu inatsisissatut siunnersuut* Inatsisartut akuersissuteqarnissaat qinnutigineqarpoq.

Sullivimmi avatangiisit pillugit inatsit 1986-imeersuuvoq, 2005-imilu kingullermik annertuumik nutarterneqarluni, tassa imaappoq ukiut 17-it matuma siorna.

Siunnersuummi inatsimmik allanguineq annertuvoq. Siunnersuutip sullivimmi avatangiisit pillugit inatsit nutartissavaa, suliffeqarneq eqqarsaatigalugu, taamaalilluni inatsit ullumikkumut malinnaasinneqalerluni.

Inatsisissatut siunnersuummi allanguutit pingaarnernut ilaapput sullivimmi tarnikkut avatangiisit ukkatarineqarnerannik patajaallisaaneq, ilanngullugu sulinerup avataani sullivimmut tunngatillugu nakuuserfigineqarneq, isumannaallisaaneq peqqinnissarlu pillugit suleqatigiinnerup nutarsarnera, suliffeqarfinni sullivimmik naliliisarnermi (APV) piunasaqaatinik patajaallisaaneq, Sullivinnik Nakkutilliisoqarfiup qisuariaateqarnermut periarfissaanik annertunerulersitsineq, oqartussanit allanit oqartussanullu allanut paasissutissanik katersinissamut, suliaqarnissamut ingerlatitseqqiinermullu tunngavissaq, suliffeqarfiit Sullivinnik Nakkutilliisoqarfimmik isumaqatigiissusiornissamut periarfissaat aamma pineqaatissiinerit sakkutunerulersinneqarnerat.

Sullivimmi tarnikkut avatangiisit ukkatarineqarnerisa patajaallisarneqarnerat ilaatigut ingerlanneqassaaq inatsimmi siunertamut aalajangersakkami § 1-imi erseqqissaanikkut, inatsimmi ilaatinneqartut sullivimmi tarnikkut aamma timikkut avatangiisit pineqarmata.

Inatsisissatut siunnersuutip suliffeqarfinni isumannaallisaaneq peqqinnissarlu pillugit sulineq pillugu malittarisassat nutarterpai, ilaatigut suliffeqarfinni mikisuni isumannaallisaaneq pillugu aaqqissuussiffiunngitsuni suleqatigiinneq patajaallisarlugu aamma suliffeqarfinni

isumannaallisaaneq pillugu aqqissuussiffiusuni sullivimmi avatangiisit pillugit sulinermi aqqissuussineq eqqarsaatigalugu eqaannerusumik malittarisassiornermi.

Kalaallit Nunaanni kajumissutsimik sulineq pingaaruteqarpoq, ilaatigut inuiaqatigiinni ataqatigiinnermut. Siunnersuutaavoq kajumissutsimik sulinerit aalajangersimasut suliffeqarfinni isumannaallisaaneq peqqinnissarlu pillugit sulineq pillugu aqqissuussaannermut aamma sullivimmik nalilersuinnermut malittarisassanit ilaatinneqassanngitsut.

Naggataatigut inatsisissatut siunnersuut teknikkimut allannguutinik arlalinnik imaqarpoq, ilanngullugit oqaatsit atornerqartut nutarterneri aamma teknikkikkut atortorissaarutit pillugit malittarisassat ersarissarneri kiisalu atortussiat atortullu pillugit piumasaqaateqarnissamut pisinnaatitsissummik ilanngussineq.

Taamatut oqaaseqarlunga siunnersuut Inatsisartut suliarinissaanut ingerlateqqippara.